



Ordinaziun per il diever da parcadis publics per la vischnaunca Lumnezia

Approbada dalla suprastanza communal il 22 d'october 2018

Revisiuns:
04 da mars 2019

La versiun actuala ei en vigur dapi il 04 da mars 2019 (Conclus dils 04 da mars 2019)

Cuntegn

1.	Disposiziuns generalas	3
	Art. 1 En general	3
	Art. 2 Definiziun	3
2.	Diever	3
	Art. 3 Dretg da diever	3
	Art. 4 Scamonds e limitaziuns	3
	Art. 5 Disponibilitad	3
3.	Dessignaziun dils parcadis	4
	Art. 6 Zonas	4
	Art. 7 Signalisaziun	4
4.	Concessiuns da lubientschas	4
	Art. 8 Lubientschas	4
5.	Taxas	4
	Art. 9 Taxas	4
6.	Disposiziuns penelas	5
	Art. 10 Castitgs e procedura	5
7.	Disposiziuns finalas	5
	Art. 11 Entrada en vigur ed abrogaziun dil dretg vertent	5

Ordinaziun per il diever da parcadis publics dalla vischnaunca Lumnezia

dils 22 d'october 2018 (Versiun actuala dils 04 da mars 2019)

La suprastanza communal,

sebasond sin art. 10 dalla lescha davart igl uorden public per la vischnaunca Lumnezia

concluda

1. Disposiziuns generalas

Art. 1 En general

¹ Questa ordinaziun regla igl uorden da parcar sin plazz ed areals publics dalla vischnaunca Lumnezia enteifer il territori habitau.

² La suprastanza communal sa fixar disposiziuns specialas per ulteirurs territoris.

Art. 2 Definiziun

Parcadis publics el senn da quest'ordinaziun ein ils plazz ed areals ch'ei en possess ni en dretg d'utilisaziun dalla vischnaunca Lumnezia. Ils parcadis vegnan mess a disposiziun gratuitamein ni encunter indemniziun.

2. Diever

Art. 3 Dretg da diever

¹ Da principi eis ei lubiu da deponer vehichels mo sin plazz ed areals publics ch'ei dessignai sco parcadis.

² Per il diever da parcadis sin terren public valan mintgamai las signalisaziuns dils plazz ed areals.

³ Il deponer vehichels sin in plaz ni areal public duront la notg vala sco diever **sur** il rom general e basegna ina lubientscha.

⁴ La suprastanza communal sa lubir excepziuns en cass specials, per occurrenz, fiastas popularas, e.a.v.

Art. 4 Scamonds e limitaziuns

¹ Sils parcadis publics pil diever el rom general vala in scamond da parcar la notg.

² En loghens nua ch'ina circulaziun sils parcadis ei necessaria, san vegnir fixadas limitas per il cuoz da parcar.

³ La suprastanza communal fixescha las uras.

Art. 5 Disponibilitad

La vischnaunca ei buca obligada da tener liber permanentamein ils parcadis publics ni da rumir la neiv. Medemamein eis ella buca obligada da schar vi parcadis.

3. Designaziun dils parcadis

Art. 6 Zonas

¹ Ils parcadis publics vegnan repartgi ellas suandontas zonas:

- a. Parcadis publics per diever permanent
- b. Parcadis dil gi
- c. Parcadis cun ina limita da 3 uras duront ils luverdis
- d. Parcadis attribui ni affittai ad objects ni menaschis

² Tenor basegns vegnan introducidas ulteriuras zonas.

Art. 7 Signalisaziun

¹ La signalisaziun dallas zonas tenor art. 6 a) b) c) succeda enteifer ina procedura publica ed en entelgientscha cun la polizia da traffic dil cantun Grischun.

² Ils parcadis tenor art. 6 d) vegnan signalisai entras il survetsch tecnic dalla vischnaunca cun tablas da reservaziun. Ils cuosts per quella signalisaziun vegnan adossai al fittader dil parcadì.

³ La rumida da neiv sils parcadis tenor art. 6 d) ei caussa dil fittader. Il fittader sa incumbensar il survetsch tecnic dalla vischnaunca da rumir la neiv encunter indemnizaziun.

4. Concessiuns da lubientschas

Art. 8 Lubientschas

¹ Lubientschas da parcar vegnan concedidas al fittader dil plaz. Ellas ein buca transmissiblas.

² La damonda da far diever dils parcadis per diever permanent tenor art. 6 a) sa vegnir inoltrada electronicamein ni tier l'administraziun communal. Las lubientschas per 24 uras e per in'jamna valan per in vehichel. Per las lubientschas dil meins, da miez onn e digl entir onn sa vegnir indicau maximalmein duas numeras da vehichels per mintga lubientscha da parcar. Ei astga denton buca vegnir parcau omisdus vehichels il medem mument sin in parcadì public. La lubientscha vala per parcar sin in plaz dessignau senza il dretg per in plaz specific.

³ Il diever da parcadis dil gi tenor art. 6 b) ei reglaus tenor signalisaziun el liug.

⁴ Per parcar sils plazs cun in cuoz da parcar limitau tenor art. 6 c) drova ei ina schiba da parcar. Quella sto indicar las uras dall'arrivada ed ei da metter davos il paravent dil vehichel aschia ch'ella seigi bein veseivla d'ordeifer.

⁵ La lubientscha per far diever da parcadis tenor art. 6 d) vegn concedida dalla suprastonza communal e reglada en in contract d'affittaziun.

⁶ La vischnaunca Lumnezia surprenda negina responsabladad per donns caschunai vida vehichels ch'ei parcai sin parcadis publics tenor art. 6 a) tochen d) ni per enguladetschs da tals vehichels.

5. Taxas

Art. 9 Taxas

¹ Las taxas per il diever da parcadis permanents tenor art. 6 a) muntan a:

- | | | |
|---------------------|-----|--------|
| a. Taxa da 24 uras | CHF | 5.00 |
| b. Taxa dall'jamna | CHF | 20.00 |
| c. Taxa dil meins | CHF | 50.00 |
| d. Taxa da miez onn | CHF | 200.00 |
| e. Taxa digl onn | CHF | 400.00 |

² Las taxas annualas per parcadis attribui ni affittai ad in object ni menaschi tenor art. 6 d) vegnan fixadas dalla suprastonza communal el rom da CHF 300.00 – 600.00, risguardond il liug e la qualidad dil plaz.

³ Per plazs reservai e buca nezegiai exista negin dretg da restituziun.

6. Disposiziuns penals

Art. 10 Castitgs e procedura

¹ Surpassaments encunter questa ordinaziun vegnan puni tenor la Ordinaziun federala davart las multas disciplinaras (OMD, RS 741.031). La suprastonza communal definescha ils funcziunaris communalns ni tiarzas persunas ch'ei autorisadas d'incassar la multa.

² Per la procedura da multas disciplinaras valan tenor art. 4 al. 3 dalla Lescha introductiva tier il cudisch da procedura penala svizzer (LItCPP, DG 350.100) las disposiziuns corrispundentas da quella lescha conform al senn (art. 45 tochen 49 LItCPP).

7. Disposiziuns finalas

Art. 11 Entrada en vigur ed abrogaziun dil dretg vertent

¹ Questa ordinaziun va en vigur suenter l'approbaziun entras la suprastonza communal.

² Cun l'entrada en vigur dalla presenta ordinaziun vegnan tut ils conclus da vischnaunca ch'ei cuntradictoris a questa ordinaziun abrogai, specialmein ils reglaments davart il diever da parcadis publics dallas anteriuras vischnauncas dalla Lumnezia.

³ L'ordinaziun ei vegnida revedida a caschun dalla radunnonza dils 04 da mars 2019.

Il president communal

Duri Blumenthal

Igl actuar:

Marcus Cavegn